

Na osnovu člana 174. stav 1. Zakona o vodama („Službene novine Federacije BiH“, broj 70/06) federalni ministar poljoprivrede, vodoprivrede i šumarstva u saradnji sa federalnim ministrom finansija, donosi

P R A V I L N I K

o načinu obračunavanja, postupku i rokovima za obračunavanje i plaćanje, i kontroli izmirivanja obaveza na osnovu opće vodne naknade i posebnih vodnih naknada

POGLAVLJE I - OPĆE ODREDBE

Član 1.

- (1) Ovim Pravilnikom se utvrđuje način i postupak obračunavanja i plaćanja, kontrola i rokovi obračunavanja i izmirivanja obaveza po osnovu opće i posebnih vodnih naknada (u daljem tekstu: vodne naknade).
- (2) Vodne naknade su javni prihodi propisani odredbama Zakona o vodama („Službene novine Federacije BiH“, broj 70/06), (u daljem tekstu: Zakon), čija visina se utvrđuje prema odredbama čl. 169. i 170. Zakona i Odlukom o visini posebnih vodnih naknada („Službene novine Federacije BiH“ br. 46/07, 10/14 i 03/16) (u daljem tekstu: Odluka)
- (3) Vodne naknade iz stava (2) ovog člana se obračunavaju i plaćaju u skladu sa Zakonom i odredbama ovog Pravilnika.

POGLAVLJE II – OPĆE I POSEBNE VODNE NAKNADE

A. Način obračunavanja i plaćanja opće vodne naknade

Član 2.

- (1) Opća vodna naknada (u daljem tekstu: OVN) iz člana 169. Zakona obračunava se množenjem stope od 0,5% sa osnovicom koju čini:
 - a) neto iznos plaće svih zaposlenika u radnom odnosu na određeno i neodređeno vrijeme;
 - b) neto iznos naknade lica po ugovoru o djelu angažovanih kod obveznika, ugovoru o autorskom honoraru i po osnovu ostalih naknada ostvarenih od samostalnog rada;
 - c) neto iznos plaće iz osnovice za obračun doprinosa određenih obveznika iz člana 20. stav (2) Zakona o doprinosima („Službene novine Federacije BiH“ br. 35/98, 54/00, 16/01, 37/01, 1/02, 17/06, 14/08, 91/15, 104/16, 34/18 i 99/19) za fizička lica - samostalne poduzetnike.
- (2) OVN iz stava (1) ovog člana uplaćuje poslodavac – isplatilac plaće, odnosno naknade po ugovoru o djelu i samostalni poduzetnik koji obavlja djelatnost zajedno sa isplatom plaće, naknade po ugovoru o djelu i dohotka.
- (3) OVN uplaćuje se na depozitne račune javnih prihoda kantonalnih budžeta prema sjedištu pravnog lica, odnosno prema sjedištu njegove poslovnice ili prema mjestu obavljanja djelatnosti fizičkog lica.
- (4) Nadležni kantonalni organi dužni su mjesno nadležnoj agenciji za vode u elektronskoj formi, mjesečno dostavljati podatke o pojedinačnim uplatama OVN-a do 5-og u mjesecu za prethodni mjesec.

- (5) Obveznici obračunavanja i plaćanja opće vodne naknade dužni su na posebnom obrascu „OVN – Izvještaj o obračunatoj i uplaćenju općoj vodnoj naknadi“, na godišnjem nivou sačiniti izvještaj o obračunu i plaćanju opće vodne naknade i isti u skladu sa članom 37. Zakona o računovodstvu i reviziji FBiH predati instituciji za prijem računovodstvenih iskaza, zajedno sa obaveznim računovodstvenim iskazima kao i jedan primjerak nadležnoj organizacionoj jedinici Porezne uprave Federacije BiH u roku određenom za predaju računovodstvenih iskaza.
- (6) Obrazac „OVN“ nalazi se u Prilogu 10. ovog Pravilnika i čini njegov sastavni dio.
- (7) Nadležna institucija za prijem računovodstvenih iskaza u roku od 90 dana po prijemu OVN i obradi istih obrađene podatke iz navedenog obrasca za svakog obveznika dužna je proslijediti nadležnoj agenciji za vode u elektronskoj formi.

POGLAVLJE III-POSEBNE VODNE NAKNADE

B. Način obračunavanja posebnih vodnih naknada

a) Posebne vodne naknade za korištenje površinskih i podzemnih voda

Član 3.

- (1) Način obračunavanja posebne vodne naknade (u daljem tekstu: PVN) za korištenje površinskih i podzemnih voda iz člana 170. stav (1) tačka 1. al. 1. do 6. Zakona razlikuje se zavisno od načina zahvatanja i korištenja vode i to za:
 - a) javna komunalna preduzeća i drugi operatori vodovodnih sistema koja vrše zahvatanje i isporuku vode za javno vodosnabdijevanje potrošača priključenih na vodovodni sistem kojim upravljaju i
 - b) fizička i pravna lica koja zahvatanje vode vrše za druge namjene (u daljem tekstu: fizičko i pravno lice) namjene iz člana 170. stav 1. tačka 1. alineja 2. do 6. Zakona o vodama, uključujući i korištenje vode za proizvodnju alkoholnih i bezalkoholnih pića, vina, voćnih vina i njihovih proizvoda, piva i slada.
- (2) Javna komunalna preduzeća i drugi operatori vodovodnih sistema sredstva PVN-a iz stava (1) ovog člana obračunava u skladu sa odredbama ovog Pravilnika za ukupno zahvaćenu količinu vode.
- (3) Javna komunalna preduzeća i drugi operatori vodovodnih sistema PVN iz stava (1) tačka a) ovog člana za zahvaćenu količinu vode naplaćuje od svojih krajnjih korisnika putem računa za isporučenu vodu.
- (4) Fizičko i pravno lice iz stava (1) tačka b) ovog člana PVN za korištenje površinskih i podzemnih voda samostalno obračunava.

Član 4.

Obveznici iz člana 3. stav (1) ovog Pravilnika PVN za korištenje površinskih i podzemnih voda obračunavaju mjesečno množenjem količine zahvaćene vode za svaki pojedinačni vid korištenja iz člana 170. stav (1) tačka 1. al. 1. do 6. Zakona izražene u m³ sa visinom ove PVN određenoj u Odluci.

b) Posebne vodne naknade za korištenje vode za proizvodnju električne energije dobivene korištenjem hidroenergije

Član 5.

- (1) PVN za korištenje vode za proizvodnju električne energije dobivene korištenjem hidroenergije iz člana 170. stav (1) tačka 2. Zakona obračunava se mjesečno, množenjem ukupne količine proizvedene električne energije izražene u kilovatsatima (kWh) sa visinom ove PVN određenoj u Odluci.
- (2) Obveznik plaćanja PVN za proizvodnju električne energije dobivene korištenjem hidroenergije je i fizičko ili pravno lice koje samo ne proizvodi električnu energiju, ali vrši isporuku vode za njenu proizvodnju van Bosne i Hercegovine, a obračunavanje PVN-a se vrši na način propisan u stavu (1) ovog člana.

c) Posebne vodne naknade za zaštitu voda

Član 6.

- (1) Posebne vodne naknade za zaštitu voda za transportna sredstva koja za pogon koriste naftu i naftne derivate iz člana 170. stav (1) tačka 3. alineja 1. Zakona obračunava se množenjem količine zagađenja voda u toku jedne kalendarske godine izražene preko ekvivalentnog broja stanovnika (EBS) sa visinom ove PVN određenoj u Odluci.
- (2) Količina zagađenja voda iz stava (1) ovog člana izračunava se korištenjem „Tabele koeficijenta zagađenja“ iz Poglavlja II tačka 1. Priloga 1. ovog Pravilnika „Način i metode utvrđivanja količina zagađenja otpadnih voda“ (u daljem tekstu: Metode) koji čini njegov sastavni dio.

Član 7.

- (1) Način obračunavanja PVN za zaštitu voda za ispuštanje otpadnih voda iz člana 170. stav (1) tačka 3. alineja 2. Zakona razlikuje se zavisno od načina i vrste otpadnih voda koje se ispuštaju i načina snabdijevanja vodom i to za:
 1. fizička i pravna lica koja vrše ispuštanje:
 - a) otpadnih voda u površinske vode i/ili indirektno ispuštanje otpadnih voda u podzemne vode, a zahvatanje vode za potrebe vodopsnabdijevanja vrše samostalno,
 - b) tehnoloških otpadnih voda u javni kanalizacioni sistem iz objekata i postrojenja koja podliježu obavezi pribavljanja okolinske dozvole u smislu odredbi Zakona o zaštiti okoliša ("Službene novine Federacije BiH", broj 15/21), bez obzira na način snabdijevanja vodom,
 - c) tehnoloških otpadnih voda putem kanalizacionog sistema ili direktno u površinske vode i/ili indirektno u podzemne vode i kod kojih se snabdijevanje vodom vrši putem operatora vodovodnog sistema,
 - d) oborinske onečišćene vode koje nastaju ispiranjem oborinama s površina: autocesta, aerodroma i sličnih prometnih objekata, benzinskih crpki, radionica za popravak vozila

sa nenatkrivenim radnim prostorom koje su u vlasništvu fizičkih i pravnih lica ili su im data na korištenje ili upravljanje i za

2. Javna komunalna preduzeća i drugi operatori vodovodnih sistema, za sve korisnike kojima isporučuju vodu bez obzira da li su priključeni na kanalizaciju.
- (2) Obveznici PVN-a iz stava (1) tačka 1. al. a) do c) ovog člana istu samostalno obračunavaju.
- (3) Javna komunalna preduzeća i drugi operatori vodovodnih odnosno kanalizacionih sistema (u daljem tekstu: JKP-i) koji su dužni pribaviti vodnu dozvolu za ispuštanje otpadnih voda naselja, PVN za zaštitu voda iz stava (1) tačka 2. ovog člana obračunavaju u skladu sa odredbama ovog Pravilnika na osnovu ukupno isporučene količine vode krajnjim korisnicima, za sve korisnike kojima isporučuju vodu, bez obzira da li su priključeni na kanalizaciju.
- (4) JKP-i iz stava (1) tačka 2. ovog člana PVN naplaćuju od svojih krajnjih korisnika putem računa za isporučenu vodu.
- (5) PVN iz stava (1) ovog člana obračunava se mjesečno množenjem količine zagađenja voda izraženog preko ekvivalentnog broja stanovnika (EBS) sa visinom ove PVN određenoj u Odluci.
- (6) Izuzetno od stava (4) ovog člana, obračunavanje PVN za zaštitu voda iz stava (1) tačka 2. ovog člana JKP-i neće vršiti krajnjim korisnicima vode koji su obveznici pribavljanja vodne dozvole u skladu sa Zakonom, a koji korisnici su dužni pribavljenu vodnu dozvolu prijaviti operateru u roku od (5) dana od dana njene pravosnažnosti.

Član 8.

PVN iz člana 170. stav (1) tačka 3. alineja 3. Zakona obračunava se mjesečno množenjem količine proizvedene ribe u obračunskom periodu izražene u kilogramima (kg) sa visinom ove PVN određenoj u Odluci.

Član 9.

- (1) PVN iz člana 170. stav (1) tačka 3. alineja 4. Zakona obračunava se mjesečno množenjem proizvedene ili uvezene količine vještačkog đubriva u obračunskom periodu izražene u kilogramima (kg) sa visinom ove PVN određenoj u Odluci.
- (2) Izvezene količine proizvedenog vještačkog đubriva, prema izveznoj fakturi koja se dostavlja uz obrazac iz člana 25. ovog Pravilnika, ne uzimaju se u obračun.

Član 10.

- (1) PVN iz člana 170. stav (1) tačka 3. alineja 4. Zakona obračunava se mjesečno množenjem proizvedene ili uvezene količine hemikalija za zaštitu bilja u obračunskom periodu izražene u kilogramima (kg) sa visinom ove PVN određenoj u Odluci.
- (2) Izvezene količine proizvedenih hemikalija za zaštitu bilja, prema izveznoj fakturi koja se dostavlja uz obrazac iz člana 26. ovog Pravilnika, ne uzimaju se u obračun.

d) PVN za vađenje materijala iz vodotoka

Član 11.

PVN iz člana 170. stav (1) tačka 4. Zakona obračunava se mjesečno množenjem količine izvađenog materijala iz vodotoka u obračunskom periodu izražene u m³ sa visinom ove PVN određenoj u Odluci, odnosno sa visinom PVN-a određene u ugovoru o dodjeli prava za vađenje materijala ako je visina te naknade veća od visine PVN-a određene u Odluci.

e) PVN za zaštitu od poplava

Član 12.

PVN iz člana 170. stav (1) tačka 5. alineja 1. Zakona obračunava se na nivou jedne kalendarske godine, množenjem ukupno zaštićene površine poljoprivrednog, šumskog ili građevinskog zemljišta izražene u hektarima (ha) sa visinom ove PVN određenoj u Odluci.

Član 13.

PVN iz člana 170. stav (1) tačka 5. alineja 2. Zakona obračunava se na nivou jedne kalendarske godine, množenjem korisne površine stambenog, poslovnog ili drugog objekta, koji je zaštićen objektima za zaštitu od poplava, izražene u m² sa visinom ove PVN određenoj u Odluci.

B. Rokovi obračunavanja i plaćanja PVN

Član 14.

- (1) Obračunavanje PVN za korištenje površinskih i podzemnih voda iz čl. 3. i 4. ovog Pravilnika, PVN za korištenje vode za proizvodnju električne energije iz člana 5. ovog Pravilnika, PVN za zaštitu voda iz čl. 7, 8., 9. i 10. ovog Pravilnika, PVN za vađenje materijala iz vodotoka iz člana 11. ovog Pravilnika, vrši se do 10. u mjesecu, a plaćanje do 20. u mjesecu, za prethodni mjesec.
- (2) Obračunavanje i plaćanje PVN za zaštitu voda iz člana 6. ovog Pravilnika vrši se prilikom registracije transportnih sredstava, a PVN za transportna sredstva koja ne podliježu obavezi registracije i građevinske mašine, kao i PVN za zaštitu od poplava iz čl. 12. i 13. ovog Pravilnika za zemljište i objekte zaštićene od poplava vrši se do kraja januara tekuće, za prethodnu godinu.
- (3) Obveznici PVN za transportna sredstva koja podliježu registraciji iz člana 170 stav (3) Zakona dužni su organu nadležnom za registraciju motornih vozila prilikom podnošenja zahtjeva za registraciju dostaviti dokaz o izvršenoj uplati.
- (4) Izuzetno, u vanrednim situacijama proglašenja prirodne nesreće uslijed poplava, erozija, epidemija i drugih elementarnih nepogoda na području gdje su iste proglašene (od nadležnog tijela općine, grada, kantona, Federacije BiH ili Bosne i Hercegovine), tokom trajanja vanredne situacije i tri mjeseca nakon njenog ukidanja obveznici plaćanja PVN za korištenje površinskih i podzemnih voda i PVN za zaštitu voda mogu izvršiti polugodišnje obračunavanje i plaćanje ovih naknada.

- (5) Kod korištenja izuzeća iz stava (4) ovog člana obveznik je dužan blagovremeno izvijestiti nadležnu Agenciju za vode, obračun svojih obaveza za period izuzeća po osnovu navedenih PVN izvršiti do roka predaje „OVN-1“ obrasca iz člana 33. ovog Pravilnika, a plaćanje po istom izvršiti u roku deset (10) dana od dana predaje navedenog obrasca nadležnoj Agenciji za vode.

C. Mjerenje količina i dostavljanje izvještaja za obračunavanje i plaćanje PVN

Član 15.

- (1) Pravna i fizička lica, obveznici obračunavanja i plaćanja PVN za korištenje površinskih i podzemnih voda obavezni su ugraditi mjerne uređaje i voditi evidencije o količinama zahvaćene vode u skladu sa Pravilnikom o sadržaju i načinu vođenja evidencije i dostavljanja podataka o količinama zahvaćene vode („Službene novine Federacije BiH“ broj 83/08) i utvrđene podatke evidentirati u obrazac „ZV“ - Izvještaj o količini zahvaćene vode i obračunu PVN-a“, koji se nalazi u Prilogu 2. ovog Pravilnika i čini njegov sastavni dio.
- (2) Obveznici iz stava (1) ovog člana dužni su mjerne uređaje održavati u ispravnom stanju, odnosno obavezni su vršiti redovna baždarenja kako je to određeno Pravilnikom o sadržaju i načinu vođenja evidencije i dostavljanja podataka o količinama zahvaćene vode („Službene novine Federacije BiH“, broj 83/08).

Član 16.

- (1) Obveznici PVN za proizvodnju električne energije dobivene korištenjem hidroenergije iz člana 170 stav (2) Zakona, dužni su voditi evidencije o količini proizvedene električne energije izražene u kilovatsatima (kWh) i utvrđene podatke evidentirati u obrazac „PEE - „Izvještaj o količini proizvedene električne energije dobivene korištenjem hidroenergije sa obračunom PVN-a“ koji se nalazi u Prilogu 3. ovog Pravilnika i čini njegov sastavni dio.
- (2) Obveznik iz stava (1) ovog člana koji sam ne proizvodi električnu energiju, ali vrši isporuku vode za njenu proizvodnju van Bosne i Hercegovine, dužan je osigurati da mu osoba kojoj isporučuje vodu za proizvodnju električne energije korištenjem hidroenergije mjesečno dostavlja podatke o količini proizvedene električne energije u kilovatsatima (kWh), a dostavljene podatke evidentirati na način propisan u stavu (1) ovog člana.

Član 17.

- (1) Mjerenje protoka i ispitivanje fizičkih i hemijskih osobina ispuštene otpadne vode i utvrđivanje ekvivalentnog broja stanovnika (EBS) za obveznike iz člana 7. ovog Pravilnika i utvrđivanje ekvivalentnog broja stanovnika (EBS) za obveznike iz člana 6. ovog Pravilnika vrši se na način propisan u poglavljima I. i II. Metoda iz Priloga 1. ovog Pravilnika.
- (2) Organ koji vodi postupak izdavanja vodne dozvole dužan je u skladu sa odredbom člana 12. Pravilnika o sadržaju, obliku, uslovima, načinu izdavanja i čuvanju vodnih akata („Službene novine Federacije BiH“ br.31/15, 55/19, 41/20 i 63/22) (u daljem tekstu: Pravilnik o vodnim aktima) prilikom donošenja rješenja o vodnoj dozvoli obvezniku

precizirati prema kojoj od metoda utvrđenih u Prilogu 1. ovog Pravilnika će vršiti utvrđivanje količine zagađenja otpadnih voda koje ispušta i to:

1. mjerenjem sa izradom elaborata,
 2. korištenjem tablice koeficijenata zagađenja i
 3. po osnovu količine isporučene vode.
- (3) Određivanje metode za obračun količine zagađenja iz odredbe stava (2) ovog člana, vrši se na osnovu dokumentacije koja se dostavlja uz zahtjev za izdavanje vodne dozvole i uviđaja na licu mjesta shodno Pravilniku o vodnim aktima i podataka iz Anketnog lista izrađenog na obrascu iz Priloga 11. ovog Pravilnika koji čini njegov sastavni dio, a koji se predaje uz dokumentaciju za izdavanje vodne dozvole.

Član 18.

- (1) Utvrđivanje količine (stepena) zagađenja otpadne vode vrši se na osnovu jedinice mjere – jednog ekvivalentnog stanovnika (ES).
- (2) Ukupan broj ekvivalentnih stanovnika (EBS) za zagađivače voda određuje se na osnovu količine zagađenja koji se proizvodi u toku dvadesetčetverosatnog ispuštanja otpadne vode pri normalnim uslovima proizvodnje i pri normalnim vremenskim uslovima.

Član 19.

- (1) Obveznici obračunavanja i plaćanja PVN za zaštitu voda iz člana 7. ovog Pravilnika čija ukupna mjesečna količina zagađenja prelazi 500 EBS, svi obveznici koji imaju izgrađen uređaj za prečišćavanje otpadnih voda, kao i obveznici koji vodu koriste za rashlađivanje sistema (bez obzira na mjesečni iznos EBS-a), dužni su najmanje jedanput u dvije godine izvršiti utvrđivanje količine zagađenja otpadnih voda ispitivanjem uzoraka otpadne vode odnosno otpadnih i štetnih materija prije njihovog ispuštanja u recipijent, te izraditi elaborat o utvrđenom stanju i jedan primjerak elaborata dostaviti mjesno nadležnoj agenciji za vode.
- (2) Ukupan broj ekvivalentnih stanovnika (EBS) utvrđen u elaboratu iz stava (1) ovog člana predstavlja godišnje opterećenje otpadnih voda.
- (3) Na osnovu podatka iz stava (2) ovog člana, obveznik vrši izračun broja EBS na mjesečnom nivou i unosi u obrazac „EBS – Mjesečni izvještaj o obračunu broja ekvivalentnih stanovnika i obračunu PVN-a“, koji se nalazi u Prilogu 5. ovog Pravilnika i čini njegov sastavni dio.

Član 20.

- (1) Mjerenje protoka, ispitivanje fizičkih i hemijskih osobina ispuštene otpadne vode, utvrđivanje broja EBS i izradu elaborata o utvrđenom stanju vrše ovlaštene laboratorije iz člana 64. Zakona.
- (2) Prilikom uzorkovanja otpadnih voda, obveznik obračunavanja i plaćanja PVN za zaštitu voda iz člana 7. ovog Pravilnika, uposlenicima ovlaštene laboratorije mora obezbijediti važeću vodnu dozvolu, pristup sistemu za tretman i odvodnju otpadnih voda, podatke o vrsti i kapacitetu proizvodnje na dan ispitivanja, anketni list, situaciju odvodnje i tretmana otpadnih voda sa svim ispustima otpadne vode sa oznakom i koordinatama svakog ispusta, kao i sve druge potrebne podatke za osiguranje ispitivanja iz stava (1) ovog člana. Sve navedene podatke i dokumente angažovana laboratorija je dužna uključiti u elaborat o utvrđenom stanju.

- (3) Ukoliko od strane Federalnog ministarstva poljoprivrede, vodoprivrede i šumarstva (u daljem tekstu: Federalno ministarstvo), Federalne uprave za inspekcijske poslove (u daljem tekstu: Federalna uprave) ili nadležne agencije za vode, bude zatraženo provođenje kontrolnog ispitivanja tereta zagađenja, isto će biti izvršeno od strane referentnog laboratorija ili laboratorija ovlaštenog za vršenje kontrolnih ispitivanja u skladu sa odredbama propisa iz člana 64. stav (5) Zakona, u kom slučaju će rezultati kontrolnog ispitivanja biti mjerodavni za utvrđivanje visine obaveze po osnovu PVN za zaštitu voda.

Član 21.

- (1) Referentni ili ovlašteni laboratorij iz odredbe člana 22. stav (3) ovog Pravilnika kontrolno ispitivanje vrši uz prisustvo obveznika, vodne inspekcije i/ili uz uporedno ispitivanje ovlaštene laboratorije koju izabere obveznik, ako je obveznik osigurao njeno prisustvo.
- (2) O rezultatima kontrolnog ispitivanja referentni ili ovlašteni laboratorij za vršenje kontrolnih ispitivanja iz stava 1. ovog člana sačinjava elaborat i dostavlja ga obvezniku i nadležnoj Agenciji za vode.
- (3) Dalju proceduru obračunavanja i plaćanja PVN-a za zaštitu voda obveznik vrši u skladu sa odredbama ovog Pravilnika na osnovu elaborata iz stava 2. ovog člana i isti se primjenjuju u periodu od dvije godine računajući od prvog dana narednog mjeseca od mjeseca u kojem je vršeno kontrolno ispitivanje.

Član 22.

- (1) Kada nastupe razlozi propisani u članu 115. stav (2) Zakona, obveznik obračunavanja PVN za zaštitu voda dužan je obezbijediti novo ispitivanje otpadnih voda odnosno utvrditi EBS, i u slučaju ako rok iz člana 19. stav (1) ovog Pravilnika od prethodnog mjerenja količine zagađenja otpadnih voda nije istekao.

Član 23.

- (1) Javna komunalna preduzeća i drugi operatori vodovodnih sistema količinu zagađenja otpadnih voda odnosno EBS utvrđivat će svim korisnicima kojima isporučuju vodu, bez obzira da li su priključeni na kanalizacioni sistem, množenjem količine ukupno isporučene vode pojedinačnim korisnicima izražene u m³ sa koeficijentom zagađenja koji za slijedeće vrste zagađivača iznose:
- a) građani-domaćinstva = 0,02,
 - b) pravna/fizička lica koja su registrovana za obavljanje svih djelatnosti shodno Standardnoj klasifikaciji djelatnosti, za neproizvodne objekte za koje isporučuju vodu = 0,02,
 - c) pravna/fizička lica koja su registrovana za obavljanje svih djelatnosti shodno Standardnoj klasifikaciji djelatnosti, za proizvodne objekte za koje isporučuju vodu = 0,10 i
 - d) pravna/fizička lica koja obavljaju privrednu ili profesionalnu djelatnost (zanatstvo i uslužne djelatnosti) = 0,05.

- (2) Obveznici iz stava (1) ovog člana dužni su na osnovu evidencije o količinama isporučene vode svakom korisniku kojem isporučuje vodu obračunati količinu zagađenja izraženog u EBS-u, a utvrđene zbirne podatke evidentirati u obrazac „IV –Izveštaj o količini isporučene vode, obračun EBS-a i obračun PVN-a“ koji se nalazi u Prilogu 4. ovog Pravilnika i čini njegov sastavni dio.
- (3) Način obračuna EBS iz stava (1) ovog člana primjenjivat će se sve dok se mjerenjem ne utvrdi stvarna količina EBS na ispustima postrojenja za tretman otpadnih voda pojedinog naselja, za obveznike čije su otpadne vode uključene u sistem prečišćavanja.
- (4) Nakon izgradnje postrojenja za tretman otpadnih voda pojedinih naselja obveznici iz stava (1) ovog člana Pravilnika dužni su na osnovu evidencije o količinama isporučene vode krajnjim korisnicima i o priključenosti na uređaj izvršiti mjerenje, odnosno obračun EBS-a u skladu sa obrascem „IV -1 – Izveštaj o količini isporučene vode, obračun EBS-a i obračun PVN-a“ koji se nalazi u Prilogu 4a. ovog Pravilnika i čini njegov sastavni dio.
- (5) Izuzetno od stava (1) ovog člana, pravna i fizička lica koja su registrovana za obavljanje svih djelatnosti, shodno Standardnoj klasifikaciji djelatnosti Bosne i Hercegovine, koji koriste objekte ili obavljaju aktivnosti koje podliježu izdavanju vodne dozvole za ispuštanje otpadnih voda, a u slučaju da su priključeni na javni vodovodni sistem, količinu zagađenja otpadnih voda odnosno EBS utvrđivat će u skladu sa članom 17. ovog Pravilnika.

Član 24.

- (1) Obveznici iz člana 7. ovog Pravilnika kod kojih u tehnološkom procesu nastaju mjesečne količine zagađenja otpadnih voda do 500 ES, stepen zagađenja otpadnih voda (EBS) utvrđivat će prema Tabeli koeficijenata zagađenja i drugim metodama koje su sadržane u Prilogu 1. ovog Pravilnika.
- (2) Obveznici PVN za zaštitu voda iz stava (1) ovog člana dužni su popunjavati obrazac „EBS – Mjesečni izvještaj o obračunu broja ekvivalentnih stanovnika i obračun PVN-a“, koji se nalazi u Prilogu 5. ovog Pravilnika.
- (3) Obveznici iz stava (1) ovog člana mogu izvršiti mjerenje zagađenja svojih otpadnih voda i ukoliko se istim utvrdi mjesečna količina zagađenja otpadnih voda preko 500 ES, obveznik plaćanja PVN je dužan dalje vršiti mjerenje u propisanim periodima u skladu sa članom 19. ovog Pravilnika, a o toj promjeni je dužan izvijestiti nadležnu agenciju za vode prije početka narednog mjeseca od mjeseca u kojem je izvršio ispitivanje.

Član 25.

Obveznici obračunavanja i plaćanja PVN za zaštitu voda iz člana 170. stav (2) Zakona dužni su voditi evidencije o količinama proizvedene ribe i utvrđene količine evidentirati u obrazac „PKR“ - „Mjesečni izvještaj o količini proizvedene ribe sa obračunom PVN-a“, koji se nalazi u Prilogu 6. ovog Pravilnika i čini njegov sastavni dio.

Član 26.

Obveznici obračunavanja i plaćanja PVN za zaštitu voda iz člana 170. stav (2) Zakona dužni su voditi evidencije o proizvedenim ili uvezenim količinama vještačkog đubriva i utvrđene količine evidentirati u obrazac „PKĐ“ - „Mjesečni izvještaj o količinama proizvedenog ili uvezenog vještačkog đubriva i obračun PVN-a“, koji se nalazi u Prilogu 7. ovog Pravilnika i čini njegov sastavni dio.

Član 27.

Obveznici obračunavanja i plaćanja PVN za zaštitu voda iz člana 170. stav (2) Zakona dužni su voditi evidencije o proizvedenim ili uvezenim količinama hemikalija za zaštitu bilja i utvrđene količine evidentirati u obrazac „PKB“ - „Mjesečni izvještaj o proizvedenim ili uvezenim količinama hemikalija za zaštitu bilja i obračun PVN-a“, koji se nalazi u Prilogu 8. ovog Pravilnika i čini njegov sastavni dio.

Član 28.

Obveznici obračunavanja i plaćanja PVN za vađenje materijala iz vodotoka iz člana 170. stav (2) Zakona dužni su vršiti mjerenja izvađenog materijala iz vodotoka i utvrđene količine unositi u obrazac „IMV“ - Mjesečni izvještaj o količini izvađenog materijala iz vodotoka i obračun PVN-a“, koji se nalazi u Prilogu 9. ovog Pravilnika i čini njegov sastavni dio.

Član 29.

- (1) Mjesno nadležna agencija za vode, odnosno kantonalni organ nadležan za vode u saradnji sa nadležnom službom lokalne zajednice utvrdit će površine zemljišta i objekata iz člana 12. i 13. ovog Pravilnika, uzimajući u obzir izuzeća iz člana 172. Zakona.
- (2) Mjesno nadležna agencija za vode, odnosno kantonalni organ nadležan za vode, na osnovu podataka iz stava (1) ovog člana, u saradnji sa nadležnom službom za katastar lokalne zajednice utvrdit će obveznike plaćanja PVN za zaštitu od poplava iz čl. 12. i 13. ovog Pravilnika, najkasnije do usvajanja narednog plana upravljanja poplavnim rizikom za pripadajuće vodno područje te rješenjem utvrditi pojedinačne obaveze za plaćanje ove PVN.

Član 30.

- (1) Obveznici PVN popunjene i ovjerene obrasce iz čl. 15., 16., 19., 23., 24., 25., 26. , 27. i 28. ovog Pravilnika dužni su mjesečno dostavljati mjesno nadležnoj agenciji za vode, do 10-tog u mjesecu za prethodni mjesec.
- (2) Evidencije količina koje služe za obračunavanje i plaćanje PVN iz čl. 15., 16., 19., 21., 23. 24., 25., 26., 27. i 28. ovog Pravilnika su predmet kontrole vodne inspekcije.
- (3) Ovlašteni predstavnici agencije za vode učestvuju u kontroli iz stava (2) ovog člana kada se ukaže potreba koju procijeni vodna inspekcija.

Član 31.

- (1) Mjesno nadležne agencije za vode dužne su voditi evidencije obveznika obračunavanja i plaćanja vodnih naknada koje sadrže: osnovne podatke o obvezniku, lokaciju obveznika, djelatnost i kategoriju obveznika, posjedovanje vodne dozvole, odnosno vodne saglasnosti, podatke po obvezniku o količinama: zahvaćene vode, proizvedene električne energije, zagađenja koja se ispuštaju u površinske vode ili indirektno u podzemne vode, proizvedene ribe, proizvedenog i uvezenog vještačkog đubriva i sredstava za zaštitu bilja, izvađenog materijala iz vodotoka i površinama zemljišta i objekata zaštićenih od poplava, obračunati iznos naknade, rokove za plaćanje naknade, izmirene obaveze, dugovanja, popunjene

obrasce iz priloga ovog Pravilnika (anketni list, OVN i OVN-1 izvještaje, pripadajući obrazac obveznika naknade), elaborat o utvrđenom stanju EBS-a, opomene, druge podatke i akte.

- (2) Podaci iz stava (1) ovog člana čine bazu podataka koja će biti dio informacionog sistema voda u skladu sa članom 98. Zakona.
- (3) Na osnovu evidencije iz stava (1) ovog člana će se vršiti praćenje i kontrola naplate vodnih naknada, te potrebno izvještavanje.

POGLAVLJE IV - NAČIN PLAĆANJA POSEBNIH VODNIH NAKNADA

Član 32.

- (1) PVN se uplaćuje na depozitne račune javnih prihoda kantonalnih budžeta prema mjestu obavljanja djelatnosti pravnog ili fizičkog lica odnosno prema mjestu obavljanja djelatnosti poslovnice pravnog lica po osnovu koje nastaje obaveza plaćanja PVN-a.
- (2) Kantonalni trezori dužni su mjesno nadležnoj agenciji za vode, u elektronskoj formi, sedmično dostavljati podatke o pojedinačnim uplatama PVN-a, a mjesečne podatke o pojedinačnim uplatama do 5-og u mjesecu za prethodni mjesec
- (3) Izmirenje obaveza po osnovu PVN-a podrazumijeva plaćanje cijelog iznosa posebne vodne naknade, a u slučaju neblagovremene uplate, iste se obračunavaju i uplaćuju u skladu sa propisima o visini zatezne kamate na javne prihode.

Član 33.

- (1) Obveznici obračunavanja i plaćanja posebnih vodnih naknada dužni su na obrascu „OVN-1 – Izvještaj o obračunatoj i uplaćenju posebnoj vodnoj naknadi“, na godišnjem nivou sačiniti izvještaj o obračunu i plaćanju posebnih vodnih naknada i isti u skladu sa članom 37. Zakona o računovodstvu i reviziji FBiH predati instituciji za prijem računovodstvenih iskaza, zajedno sa obavezanim računovodstvenim iskazima kao i jedan primjerak nadležnoj organizacionoj jedinici Porezne uprave Federacije BiH u roku određenom za predaju računovodstvenih iskaza. Obrazac „OVN-1“ nalazi se u Prilogu 10a. ovog Pravilnika i čini njegov sastavni dio.
- (2) Nadležna institucija za prijem računovodstvenih iskaza u roku od 90 dana po prijemu OVN-1 i obradi istih, obrađene podatke iz navedenog obrasca za svakog obveznika dužna je proslijediti nadležnoj agenciji za vode u elektronskoj formi.

POGLAVLJE V- KONTROLA OBRAČUNAVANJA I PLAĆANJA OPĆE VODNE NAKNADE

Član 34.

- (1) Kontrolu pravilnog obračunavanja, plaćanja i postupak prinudne naplate obaveza po osnovu opće vodne naknade, vrši Porezna uprava Federacije BiH prema sjedištu pravnog lica ili njegove poslovnice, odnosno prema mjestu obavljanja djelatnosti fizičkog lica.
- (2) Za naplatu naknade iz stava (1) ovog člana primjenjuju se postupci propisani odredbama Zakona o Poreznoj upravi Federacije Bosne i Hercegovine („Službene novine Federacije BiH“ br. 33/02, 28/04, 57/09, 40/10, 27/12, 7/13, 71/14 i 91/15).

POGLAVLJE VI - KONTROLA OBRAČUNAVANJA I PLAĆANJA POSEBNIH VODNIH NAKNADA

Član 35.

- (1) Kontrolu pravilnog obračunavanja i plaćanja PVN, kao i blagovremenost dostavljanja obrazaca iz čl. 30. i 33. ovog Pravilnika vrše nadležne agencije za vode, najkasnije do 30. juna naredne godine za obaveze obveznika nastale u prethodnoj godini, uključujući i dug iz ranijeg perioda.
- (2) Ukoliko se prilikom kontrole utvrdi da obveznik nije pravilno izvršio obračun PVN-a, nadležna Agencija za vode izvršit će pravilan obračun u skladu sa odredbama ovog Pravilnika.
- (3) Mjesno nadležne agencije su obaveze redovno slati opomene obveznicima u slučaju nepostupanja po stavu (1) ovog člana.
- (4) Kada utvrdi da obveznik nije obračunao i/ili nije pravilno obračunao PVN i/ili da ga nije u cijelosti ili djelimično platio, agencija za vode je dužna u roku od 15 dana od dana utvrđenog stanja nadležnoj vodnoj inspekciji dostaviti izvještaj o utvrđenom činjeničnom stanju na nadležno postupanje.
- (5) Nadležna vodna inspekcija će po prijemu Izvještaja iz stava (3) ovog člana izvršiti inspeksijski nadzor kod obveznika radi utvrđivanja postupanja u skladu sa vodnim aktom te u skladu sa Zakonom o upravnom postupku, Zakonom o vodama i Zakonom o inspekcijama donijeti upravni akt kojim će naložiti obvezniku da izvrši obračun i/ili plaćanje PVN-a.
- (6) Ukoliko obveznik ne postupi po upravnom aktu iz stava (4) ovog člana nadležna vodna inspekcija će pristupiti izvršenju rješenja, odnosno naplati PVN-a putem nadležnog suda.

Član 36.

- (1) Agencije za vode dužne su najmanje polugodišnje izvještavati Federalno ministarstvo i Federalnu upravu za inspeksijske poslove o stepenu izmirenja obaveza i drugoj problematici koja se odnosi na obračunavanje i plaćanje vodnih naknada i predlagati mjere.
- (2) Agencije za vode su dužne izvještaj iz stava (1) ovog člana dostaviti i na zahtjev Federalnog ministarstva i Federalne uprave za inspeksijske poslove i mimo rokova navedenih u stavu (1) ovog člana.

POGLAVLJE VII – PRELAZNE I ZAVRŠNE ODREDBE

Član 37.

- (1) Danom početka primjene ovog Pravilnika prestaje da važi Pravilnik o načinu obračunavanja, postupku i rokovima za obračunavanje i plaćanje i kontroli izmirivanja obaveza na osnovu opće vodne naknade i posebnih vodnih naknada („Službene novine Federacije BiH“ br. 92/07, 46/09, 79/11 i 88/12).
- (2) Postupci izdavanja vodnih akata koji nisu okončani do dana stupanja na snagu ovog pravilnika, okončaće se po odredbama ovog Pravilnika.

Član 38.

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“, a početak će se primjenjivati od prvog dana narednog mjeseca računajući od mjeseca u kojem je ovaj pravilnik objavljen u „Službenim novinama Federacije BiH“.

Broj:

MINISTAR

Sarajevo,

godine

mr. sci. Šemsudin Dedić

MANUSKRIPT